

四庫全書

集部

欽定四庫全書

文章辨體彙選卷二百九十二

明 賀復徵 編

序十二

重刻呂氏春秋序

明王世貞

呂氏春秋一曰呂覽故秦相國文信侯不韋與其客所著書也當書成而不韋縣之咸陽市肆曰疇有能損益一字者予千金而竟莫能損益一字也其書今頗行屬

傳梓久不能無謫誤而雲間宋光祿邦乂徐太學益孫輩相與校訂重梓之而問叙於余余讀之未嘗不掩卷三歎也穆叔之次立言於品三而操觚之士若為之小屈然子桓以雄豪創起鼎革間顧歆然不自挾其有而以經世大業不朽盛事舉而屬之文章彼誠有以見之也不韋者一賈人子爾操子母之術以間行於秦而得志焉舉秦之國於股掌間挾其勁東向而瓜剖天下位相國號仲父爵通侯十萬戶彼豈有所不足哉而顧孜

攷焉思成一家言以與諸儒生角而割後世名此猶未
也不韋固莊生所不道莊生之識至欲齊死生平物我
舉一切有為之跡而空之乃亦攷焉而務欲成一家
言度其於辭不工不止故夫古之稱立言者未有不為
名使者也且以不韋之說譎狙詐豈其果與聞於道而
其容亦務相尚為權竒錯廁於鷄鳴狗盜之雄雖間採
聖賢之長辭以文之即中夜一靜思念其言於所為之
跡有不渙浥汗浹者耶惟其機心之發觸而為機言覈

削之於申韓辨巧之於儀秦有不知其所以合者則固其恒也且也不韋之所為千金者再耳一用之而聾聵秦王割其國柄再用之而聾聵一世之士而割其名雖得之而俛失之雖失之而終微得之不韋固賈人子要亦其雄哉宋子徐子與其儕二三子俱能文章嗜古若渴慕先聖不以人廢言之義而梓行之所謂芙蓉發於淤泥采之而已置淤泥勿問可也

合刻管子韓非子序

王世貞

汝師之為諸子於道好莊周列禦寇於術好管子韓非
子謂其文辭亡論高妙而所結撰之大旨遠者出人意
表而邇者能發人之所欲發於所不能發顧獨管子韓
非子不甚行世即行而其傳者多遺脫謬誤讀之使人
不勝乙徃徃不盡卷而度之高閣於是悉其貲力後先
購善本凡數十窮丹鉛之用而後授梓梓成謂世貞曰
子其序之世貞曰唯唯夫敬仲欲存糾於齊不得改而
縛於小白卒相之為天下萬世榮非子欲存韓於秦不

得改而走秦卒受僂為天下後世笑夫見榮之與見笑
於人也奚啻隔霄淵雖然是二君子者其始寧不欲出奇
捐生以殉所事哉然而奇有所不得不屈奇屈而生有
所不得不愛愛生而欲有所自見則不得終避仇敵甘
心焉而臣事之夫二君子者其所以愛生一也然而有
相有僂者何也齊不成霸形而桓公之霸心發則機合
機合仲不得不重秦并天下之形成亡所事非而非以
并天下說之欲勝其素所任之臣而自炫功則機不合

機不合非不得不輕夫豈唯輕而已秦之幸非之利秦以不若虞非之利韓遠也今夫始皇者固暴伉嗜殺人也然其明智寧出齊桓下鮑子一薦仲而立相李斯一間非而立僂非二子之工於薦與間若是也勢也夫勢之所在則天也天不欲南澤楚北澤戎狄而蠶食周故委仲於齊以為周屏翰天不欲碩果韓芽五國棄而投之秦而轉投漢故聽非子之廋紕仰藥而不之卹夫鮑子者助天為福者也非能為福者也李斯者助天為虐

者也非能為虐者也然則管子與非子材班乎曰惡乎
班夫管子者太公亞也太公所毘父子皆聖辟其用國
三分之二也而以當必渙之受管子之毘中人也其用
國九分之一也而以當方勁之楚與戎狄然則太公仲
而周王管子抑而齊霸周不太公不廢王齊不管子不
為霸固也不然而管子之書尚在其論四維辨心術亦
寧無敬怠義欲之微旨一二乎哉孔子蓋深知之故慨
然而歎曰如其仁如其仁世固未有不仁其德而亡其

功者非子之所為言雖鑿鑿衡名實推見至隱而其伎
殫於富強而已秦不用非不害為并天下以秦之守守
之必亡用非可以并天下并天下而以秦之守守之無
救亡夫并天下之與亡俱等亦安所事非子是故非子
之於霸若不足而管子之於霸蓋有餘也然則文殊乎
曰不殊也管子齊鉅卿也諸法語名跡門人家老能筆
之稷下之學士大夫能飾之其於文也辨而覈肆而典
能為戰國始者也韓非子韓之疎屬公子也也有所著述

以發其蓄而鳴其不平其於文也峭而深奇而破的能以戰國終者也毋論吾洙泗家言以較魯儒之左準右繩差不類然何至推名法家苛察繳繞錯若惠施公孫龍之汜濫詭諄哉其言各十餘萬而贏度不能無傳而小有益者要之非西京以後傳益也吾故曰不殊也蓋管子之言後見汰於孟氏而極於宋韓子之言太史公若心喜之而列之老子傳唐以尊老子故析之宋以絀老子故復合之其析其合要非以為韓非子也嗟夫儒

至宋而衰矣彼其睥睨三代之後以末世無一可者而不能不心折於孔明乃孔明則自比於管子而勸後主讀韓非子之書何以故宋儒之所得淺而孔明之所得深故也宋以名舍之是故小遇遼小不振大遇金大不振孔明以實取之是故蕞爾之蜀與強魏角而恒踞其上嗟夫汝師之所為合刻也其悠然而抱膝也毋乃有世思哉汝師曰否否吾嗜其文辭若薦三鰾者以味薦而已矣

尺牘清裁序

王世貞

夫書者辭命之流也昔在春秋游旌接轂矢揚及飛之下不廢酬往嫺婉可粲故草創潤色既非一人謀野裨邦以為首務然而出疆斷割因變為規寄文行人之口無取載函之筆離是而還書郁乎盛矣用亦大焉故燉箭聊城則百雉自摧奏章秦庭則千索盡返少卿舒鬱於毳帳子長揚泝於蠶宮良以暢人我之懷發今曩之蘊或揚扆沉冥或掎折疑豫或誘超啟蔽或釋詛通嫌

走儀秦於寸管組丘倚於尺一思則川至泉湧辨乃雲
蒸電耀其盛矣哉然皆春容文章汪洋苑翰鴈距弱雲
路虞其修阻魚腹狹波臣付以沉浮則有黃麻薄褫絨
蘇固蠟爛熳數行遙裔千里蓄止寒暄情專問慰隻事
興端片物托緒毛生為古墨卿代面醉瀟灑澁卮言熏
微其造色也烟兮隋珠之忽投其寄悰也裊兮春絲之
不斷是用河岳雖移漆膠愈結徘徊吟咀情事更絕明
月宛其依懷白雲停而不飛斯則晉客玄談之委致齊

梁纖語之極規也西蜀楊用脩少游金馬晚戌碧鷄傾
浮提之玉壺然太乙之藜杖漁執獵稗積有歲時爰奮
斯篇凡十一卷命曰尺牘清裁或因本寂寥或刪芟繁
積其見文選諸書者不復更載麗砂的礫等謝氏之碎
金玄圃崢嶸掩瑯琊之羣玉客有齎示余甚旨之第惜
其時代名氏往往訛誤所漏典籍亦不為少乃稍為訂
定仍加增葺及自唐氏迄今詞近雅馴亦附於後更為
二十四卷藏之櫝中於乎墳典既遠清徽多祕陳驚座

之十束遞供劉南昌之百函俱發流映前史以為美談
今皆闕如況其下者余既慙半豹寧免魯魚故繇中郎
酷私王充之論亦是卿家子雲覆瓿之業耳

刻韓非子序

劉鳳

韓非子書學者多有之太史公悲其知說之難而不自
免夫非之言則足以死而已尚安咎乎始非與李斯俱
學斯自以為不如斯顯於秦矣而求入焉一棲兩雄是
將欲免乎哉且其言智術能法之士與重人者不兩存

也可以寵過誣者公法而誅之不可寵過誣者私劍而窮之斯者非重人耶非於立談間遂欲矯其情行而退之斯又安得不逞其憾而隱忍為也故非者刻覈人也并其身而不顧其論進說者之情備矣俟上之所向而以吾說當之是愈疑主而不敢輕任吾說也可危也謂人主之左右舉非伯夷而與愚不肖論賢智是顯言樹怨羣臣而不自圖可危也謂人主所以馭臣當操法術如東濕如御奔可危也深言人主以所不任備所任所

使備者即所備也可危也謂君失一臣得百上下之間
惟以先發為務可危也夫察見至隱語及上之所諱皆
可畏忌者而非盡之欲自全也難矣故率非之說使人
主備臣下如嚴敵雖甚驕惰之主苟得聞之未有不懼
者也懼則思思則不敢委其枋於下使專壅已是其庶
乎哉故名法家言大抵能強主心而忍其下厚於猜而
不敢自恃臣子之恩薄而疑畏之跡深有以刻而失之
者矣未有以懦而蔽焉者也是名法之所長也今夫玉

庖至貴也通而無當則不可以盛酒瓦甒之賤而不漏
則人將安注漿哉故王道者玉庖也而不能如刑名之
易效者謂無當則不可徒貴也商申韓三子皆大畧同
術獨申不害者用韓之小國而能終其身治強且無患
鞅雖以其身覆而秦遂日以興韓則徒托之空言而已
嗚呼亦其遇不遇耶然非者韓之孽子也而卒欲覆韓
其不務維城抑何甚也鞅魏人也欺公子卬而虜之推
是心也固吳起樂羊之不若也其疑人主而自薄也術

之敝若此何怪也惜不害書久逸故申子者吾不得而見之得見二子者亦可以明名法之利害矣

孫子書校解引類序

趙本學

天地間有人則有爭有爭則有亂亂不可以鞭扑治也則有兵兵之為凶器不可以妄用也則有法其事起於鬪智角力也則其法不得不資於權謀用兵而不以權謀則兵敗國危而亂不止君子不得已而用權謀政猶不得已而用兵也用之合天理則為仁義合王法則為

禮樂故管仲霸者之佐用兵釋實而攻虛釋堅而攻耗
釋難而攻易以驩虞為道假尊周為名要純乎權謀而
已耳孔子稱之曰如其仁如其仁何歟蓋人雖權謀事
則仁義也諸葛亮澹泊以明志寧靜以致遠此存心養
性之言也躬耕南陽不求聞達此尊德樂道之行也至
於用兵知孫權之本為漢賊而姑結與為援劉璋宗室
也而掩取以併其軍仲達不戰遺巾幘以激之郭模詐
降泄人語以間之盛兵晝行夜攻遂陽以襲之息鼓偃

旗開門卻灑以疑之事雖權謀心則仁義也若宋之韓琦范仲淹寇準宗澤李綱岳飛於金主戰而不主和權謀無所不至求其人則金玉君子忠厚正直一言一行無非聖賢正心脩身之法王欽若汪伯彥黃潛善王倫秦檜之徒於金主和而不主戰未聞一啟權謀之口求其心則犬彘小人姦回險薄滔天之惡無不忍為以此觀之可見正用權謀以復君父之仇安四海之民者實為儒者分內事而致知格物之功明經學文之暇不可

不兼讀其書而潛究其理也古人著兵書凡四十餘家
存者今有其七孫子十三篇實權謀之萬變也數千年
來儒者未嘗一開其扃鑰雖有曹操李筌杜佑杜牧王
皙賈林張豫鄭友賢張資劉寅鄭霸等十五六家之箋
不過粗畧訓義苟且引證加以訛謬相承古文漸失迨
至於今凡用兵者無所於法庸非治亂所關一大缺典
乎學不自量竊重為校讐而通釋之又取古人一二已
行之事以証其下名曰校解引類使四方經生學士皆

可以讀之而不難夫自三代之後儒者不知兵其故皆以孔子不答衛靈而因以為諱殊不知春秋之時天王在上諸侯無合義之戰亦無問兵之體其不答也固宜今日不答於衛異日固請於魯使孫子生魯魯君用之以誅陳恒而明王法孔子豈不以魯為義孫子為賢乎漢唐晉宋及我聖朝天下一統禮樂征伐自天子出儻遇國家有難出而主兵何不可之有猥云德化不當用兵此迂儒保身之謀賣國之罪也學註其書又恐文士

惑不解故復推其說為之序

註參同契序

徐渭

徐君景休所註參同契存而諸家云亡者以偶不諒古人著述之體故也後儒於書句句而訓之章章而貼之故經自為經體而註自為註體古人則不然其註經也取於明經而已註之之體不章貼而句訓編而次之之人亦無從章析而句分兼之作述之手韻調不遠古今相隔考問無由指存為亡轉傳轉信矣景休之註之湮

也坐於是景休之註湮而魏公之經亦泯拔景休所以起魏公也諸家言經者欲拔景休而不得甚至欲分四言為經五言為註是止馮字數以別唱隨遂起吳儉妄裂亞掇如萬手繚絲不勝其亂好古者尚譎又從而謬序以信之註未及還經且盡失予覺其然乃取廬陵陳氏所註分章上下久之一日試挈某篇相印一經一註母子粲然以逐他篇莫不畢爾辟如陸遜東炬先攻一營遂曉攻蜀之法連營七百里一旦席卷魏經徐註既

融復明夫長者貲財記分衆子帳籍自別然當其未分
不特為衆子畫餅抑且起衆子支屬妄擬某物當得某
房誇示眷戚註未分經亦復如是及至分貲妄擬俱歇
註分經定亦復如是雖然貫穿文義印字曉人亦小補
耳若悟真機字乃無隻故分經分註援筆於既悟之後
則可牽文於未悟之先則不可不然搏控糟粕希不見
誚斲輪矣皐皐冬冬有上無下有西無東貫心於中開
戶支窓參之斗蓬一用寄衝主言始終言終於甘始於

十兄若問我心正鬼三雙而鷄十雙蒼筤中人叙言

韓非子序

趙川賢

予讀韓非子書蓋喟然而嘆曰世道之趨於權譎也君臣之間相御以智而相傾奪以捭闔抵巇之說也其至秦而極乎先王之道既熄諸侯各競於詐力而列國之士各騁其機畧辨數以務尊安其國而榮顯其身當春秋之季所號稱良大夫者如晏嬰叔向公孫僑之徒其馳詞執禮往往相厲以仁義而相訓飭以忠儉信惠是

猶先王之遺也至戰國而儀秦之徒始以其縱橫之說
勝言從親之固則諱其善敗之端語衡合之利則匿其
恐唱之迹雖其揣摩馳騖務出於奇詭而要之陳形勢
之便利規情事之變合天下猶各以其說提衡而立故
當時之君得士者昌而士之設智能批患難者亦使世
主蒙其益而顯功名於天下蓋稍蠶食而及於始皇之
身關東諸國既皆削弱無可倚以抗秦而士之爭趨秦
者非得秦權則無以震驚諸侯而快其志非訐激其詞

亦無以當主意而盡關游士之口故干秦之說愈相軋而愈不勝卒足以亡其身予於非子有深慨焉夫非子固嘗與李斯師事荀卿斯自視以為不如非矣及斯已柄秦盡用其所學非固以量斯之在吾術中而他所獨制恣睢上以塞聰掩明而下以拂世摩俗非之智又足以先斯而逆其所必至故斯方以一法制明主威而非則曰當途之臣擅勢而環其私斯方以過黨與絕異趨而非則曰獨之過將乘賢而劫其君當人臣憂死之不

暇而虞其有田常子罕之厄且以大臣之一詞同軌於
近習將使之行不法而化其主是皆斯之所醞釀鬱積
以基亡秦之禍而非乃以疎遠一旦斥而言之宜乎犯
斯之所甚忌而死不旋踵也昔者范雎羈旅入秦一言
而合繼踵卿相夫昭王之明不及秦皇李斯之專不及
魏冉非又始皇之願得與同遊者其才出雎遠甚而卒
不免僂辱為天下笑者雎當秦之一親猶數年而始得
盡發太后穰侯之私故其主信之不疑而讒邪不得以

投其間非徒知振暴其短可以傾斯說而奪之柄而不
知斯以干寵忌前之心挾狼戾無親之主乃欲自奮於
說難而卒不能以自免予以為非之持說者甚工而其
所以用術者則甚悖是其所以死也使非而幸緩須臾
秦皇方且回慮易聽當有深計而不疑交爭而不罪者
何以成沙丘之禍而鑿鑿一中非之所料如此哉非子
書大抵薄仁義厲刑禁盡斥堯舜禹湯孔子而兼取申
商慘刻之說其言恢詭叛道無足多取然其意則悲廉

直不容於邪枉一切欲反浮淫之蠹而覈之功罪之當
要亦有足采者嗟乎三代而後申韓之說常勝世之言
治者操其術而恒諱其跡予以為彼其盡紂聖賢之旨
而獨能以其說擊排詆訾歷千百年而不廢蓋必有所
以為韓非子者在矣惡可忽哉惡可忽哉此書舊亡和
玉姦刳說林凡三篇他所逸者通五十餘章今悉補次
無闕

南華發覆序

陳繼儒

南華發覆清涼山孔雀庵蘊暉老人所撰也老人繩戒
精緊狀貌清孤望之類須菩提衣表瘦骨可捫而數也
長於詩無浮屠語與之談方內方外之書旁及南華經
往往能結吾輩舌益少而習之長而遊於空山大澤間
所見莫非莊者積三十年而後發覆之註出焉正如稿
木蒸為芝菌精神肅為舍利非歲久月深者可襲取得
也世謂老莊一家余獨確然判而為二老子生於周平
王末實有作易者憂患之意其言曰吾所以有大患者

為我有身及我無身吾有何患夫七尺之軀厭而離之
不得計莫若以曲自全以昏自晦以柔弱自抱以勇於
不敢自活若谿谷若嬰孩若冬涉川若畏四鄰自古之
善恐怖者莫老子若也南華生惛惛然笑之烏用是頑且
鄙哉於是以逍遙齊物之說出而救之蓋破我然後能
破執破執然後能破生死破壽夭破禍福破譽誹破理
事破聖凡而老氏崎嶇世途之恐怖悉粉為虛空矣老
子為憂畏粘縛者也莊子為老氏解粘釋縛者也昔者

元美王先生之言曰莊子僻處清濱孟子不過大梁未嘗一見相究詰假令彼此送難其鬪必若涿鹿彭城之戰天地為之蕩而不寧日月為之晦而不明莊子敗則逃之無何有之鄉而已然而不怒也孟子不敗也敗則怒余笑曰孟子之怒必加於老而不加於莊學老子之恐怖未免流而為鄉愿學莊子之豪宕奔放不失為狂此老莊二氏門庭之辨也蘊公曰老莊是同是別眉道人姑置且從發覆註脚下細尋語脈亦有為南華轉身

吐氣處乎余曰他人以已解莊而蘊公以莊解莊蘊公
潔淨有道人也此註亦從三十年破我得來耳如郭象
為東海王越主簿素論去之呂惠卿王雱當權薰灼錮
在黑暗鐵圍中不能出彼方求蘊公懺罪不暇何暇對
塵而論南華哉即有諸註覆酒家醅可矣

國策贈序

陳繼儒

古今治亂惟在是非利害兩端經以純言是非者也策
以純言利害者也任經則世治任策則世亂而古今之

局定矣昔者結繩之俗書契未萌天下熙熙民如野鹿
即殷誓周誥聖人不得已而寢出焉何以策為策之興
也無論諸侯王從之而愚於聰國人從之而愚於兵即
其所自號墨卿者流三寸之舌沸於波濤七尺之軀閃
於輓轡卒乃以黃金為注至令自穽其身如薰骨而殘
翠者然則策安在哉即使策中所載固自有一二可喜
要之機心機事漢陰老人所掩耳而不忍聞也是策者
其將已乎曰非也夫策之為縱橫一童子能言之乃劉

中壘孔衍高誘曾鞏鮑彪吳師道諸君子參考讐校亦
使此書附庸經術之後蓋我道大矣平隴甫田不廢秦
岱清流大澤不廢龍蛟瓦石可以兆卜談笑可以解紛
顧用之何如耳用而不善則神奇化為臭腐醞醕化為
毒藥用之而善則銷鑛而為金採腋而為裘集諸瑣碎
而為竹頭木屑之用而況是策乎哉邑侯項公政既成
於鼓琴鳴鶴之暇芟削此書傳之文章士亦此意也大
抵世之有經而誦者有故客卿攘袂顛創國防始於七

雄迄於四豪皆以狙詐相參而天下靡有寧日此無他
高才奇士抑鬱而不能吐則不得不以口舌而操國君
之權乃今家絃戶誦士有奇上且張彌天之網羅之則
亦何以畏客而詘羣策為也侯今推天下治平第一必
且召而為股肱諫臣為天子爭是非蘇眉山所謂我取
其術不取其心者侯將又以是為諫法矣

劉向說苑序

董其昌

西漢之著書者自陸賈以下凡六家而卯金子居其二

淮南王安則有鴻烈解中壘校尉向則有說苑新書云
淮南之書倣詭超忽世所稱挾風霜飲沆瀣者蓋文士
多沈酣焉而向之說苑二十篇網羅舊聞應規入矩似
非好奇者所急也茲顓刻說苑何也曰向之此書其合
於立言之指者有三而文詞之爾雅不與馬裨用一也
述聖一也獻讜一也有一於此皆可傳也矧兼至焉者
乎夫語稱公輸子巧於為舟車而拙於為木為以非所
常御也顧長康易於貌神鬼而難於貌狗馬以衆所習

見也向之說苑自君道臣術迄於修文返質其標章持
論鑿鑿民經皆有益天下國家而非雕塵鏤空縱談六
合之外以動覩聽者是為裨用可傳也漢承秦後師異
道人異學自仲舒始有大一統之說然世猶未知宗趣
向之此書雖未盡洗戰國餘習大都主齊魯論家語而
稍附雜以諸子不至逐流而忘委是以獨列於儒家是
為述聖可傳也元成間中官外戚株連用事向引宗臣
大義身撓讒吻顧所謂三獨夫者共憂社稷懷忠不效

又進說苑以見志吾讀其正諫一篇蓋論昌陵論外戚封事之餘音若縷焉是為獻讜可傳也此三者鴻烈有之乎豈惟鴻烈陸大夫有向之麗而無其實賈太傳有向之辨而無其識董江都有向之醇而無其達揚子雲有向之詣而無其節知言者必能折衷矣或曰史載子政自言得淮南王枕中祕書以黃金不成獲罪則好鴻烈者宜莫如向故曾子固譏其言不深純是不然夫子政固少好淮南書者及其義甘不調齟齬憂患之偏嘗

而學術意見已一變矣昔柳河東文師國語而非國語
曾南豐文師子政而詆子政文人反攻固耳可盡信哉

淮南鴻烈解序

顧起元

余汜覽諸家於先秦得韓非氏於西京得劉安氏之二
子者其為侯王子也同其恢竒好著書同其究竟亦畧
同其人吾無取焉爾其書則學士所同嚮嗜者也而亦
變乎有辨韓非氏孽公子也幾於儕輩帶憤而為言言
多感慨而幽沉劉安氏汰公子也慮亡不帝制侈而為

言言多繽紛而閤廓韓也蒿目世情之衷而鑽入之收
其言可裨吾精嚴去其刻而可矣劉也盱衡人世之表
而苞絡之收其言足裨吾廣博去其誕而可矣且夫韓
也主乎叔者也匪直刻也時而走於僻劉也取材百氏
故時誕時沿時俚其餘謂安獨叔也者非安獨叔者也
八公氏衆竚之劉安纔一裁之爾矣故又時乎復時乎
雜故韓可徧涉而安之語必不可無裁裁誕也裁習也
裁俚也裁雜也裁複也而千古無劉安氏儼矣今世亦

多有裁之者知裁而離之也未知乎裁而合之也覩蜀
錦之寸類也片痕也剪而去之而碎之以為帶以為囊
惜乎其小周而不適乎大製也哉裁文如此不若其已
吾友張賓王及李汝謙弟季取鴻烈手定之剔去其濫
而總為全瑜驟閱之二十一章猶是故局焉縷而按之
脉絡猶是也滋洽矣氣格猶是也滋勁矣枝理猶是也
滋秩矣擇去而滋藻矣庸刊而滋奇矣試取韓公子言
類之而乃非敵也劉安氏之言曰作書喻意俟清明之

士執玄鑑於心者焉微三君子疇當之子雲有言千載而下有子雲者知子雲嗚呼疇知夫千載而下不為劉安氏也者功劉安氏也哉

東坡文選序

鍾惺

或曰東坡之文似戰國予曰有東坡文而戰國之文可廢也何以明之戰國之言非縱橫則名法於先王之仁義道德禮樂刑政無當焉而其文終古不可廢者以其雄博高逸之氣紆回峭拔之情常存於天地之間也使

戰國人舍其所謂縱橫名法而以為仁義道德禮樂刑政之言則其心手不相習志氣不相隨必不能如是雄博如是高逸如是紆回峭拔以成其為戰國之文故文之存理之亡也夫必亡理而後存文則是理者事詞之崇而文之賊也豈有是哉今且有文於此能全恃其雄博高逸之氣紆回峭拔之情以出入於仁義道德禮樂刑政之中取不窮而用不敝體屢遷而物多姿則吾必舍戰國之文從之其惟東坡乎今之選東坡文者多矣

不察其本末漫然以趣之一字盡之故讀其序記論策
奏議則勉卒業而恐卧及其小牘小文則捐寢食徇之
以李溫陵心眼未免此累況其下此者乎夫文之於趣
無之而無之者也譬之人趣其所以生也趣死則死人
之能知覺運動以生者趣所為也能知覺運動以生而
為聖賢為豪傑者非盡趣所為也故趣者止於其足以
生而已今取其止於足以生者以盡東坡之文可乎哉
是故老莊者出世之文之妙者也毅然斥之不疑商韓

者經世之文之妙者也竟鄙其人陋其說而已夫東坡
而非文人也則可東坡而文人也豈有不知其文之妙
者哉以為吾舍此自有真學問真文章理義足乎中而
氣達乎外膽與識謾謾然於筆墨之下取戰國之風調
易以已所欲言而其淵源相去遠矣世有病戰國之文
無當於道而愛其文終不能廢者吾請以東坡之文代
之昔銅臺妓有妙於音而性惡者魏武帝欲殺之而難
其才乃選數十百人一時俱教久之有一人音與之齊

即殺惡性者此所謂有東坡文而戰國之文可廢之說也且夫戰國之文亦自有等馬人但知國策為戰國之文而不知孟子亦戰國之文也老泉好孟子此蘇家文出戰國之原也

奇賞自序

陳仁錫

郭參軍曰疏其壅闕闢其第蕪領其玄致標其洞涉庶逸文不墜於世奇言不絕於今愚非其人也間嘗折衷往古有一代大作手有一代持世之文有一代榮世之

文各標而出之嗟嗟大作手不數苟不能以文持世也
且勿辱乎哉不辱之文非玉不源非雷不櫟非貞不綿
非介不嚴非濯不色非恥不剡非別不味非耘不淨非
理不惑非懼不醇非爛不化崧山有玉膏其源沸沸湯
湯豈詎采縛駮聲激素飛清分風劈流乎哉故曰玉以
源之變之皮為鼓櫟以雷獸之骨揚聲五百里故曰雷
以櫟之錦濯蜀江而鮮滌以它水錦色弱矣故曰濯以
色之涓石柱有村留神與魯般語班令其形見曰貌寧

醜卿善圖物容畏卿不出故曰恥以刻之鱸奮鰭遡流
望濤直上曝鰓失濟故曰貞以綿之女靈山不連崗以
成高不託勢以自遠故曰介以嚴之有人灘焉其石人
面鬚髮皆具非人也獬豸音聲麗妙如好婦女非婦女
也漣石魚形燒之作魚膏腥雷風相薄山巔如驚頡頏
非鶩也非魚也故曰別以味之鳥耘會稽春拔草根秋
啄其穢又若廩君之殺鹽神也故曰耘以淨之楊武與
母遇虎負母以號虎見其情俱耳而去故曰理以感之

鳥音如痺多放士如吟大水如啄木大絲如豚大旱如
晨鵠大兵立言亦然故曰懼以醇之劉蛻志文冢云慎
無朽為芝菌以怪人自媚慎無堅為金鐵以行貨起爭
慎無滴乎醴泉以味乎諂口故曰腐以化之噫保國狼
獠猶知閤中艱金況文字乎所謂持世榮世二種之文
可以知矣是集也首屈大夫所謂大作手亦可以知矣

續古文奇賞序

陳仁錫

文章有殺生而無奇正殺生奇也奇外無正文兵也兵

禮也始武經繼戴禮終文苑英華以此蓋武事之不張
繇文心之不足故兵以武為植以文為種兵法有之人
人正正辭辭火火又曰世能祖祖鮮能下下夫火火文
士之武心也下下武士之文心也尊文賤武吾茲不信
今實無文士安得而尊之實無武夫安得而賤之古今
無不翻案之文人亦無空讀兵書之武士李衛公斷劉
項皆非將將之君而陣圖陣法皆可廢不出多方以誤
之致人而不致於人而已此善翻案者也生殺在乎呼

吸則文章自於喉舌間脩奇脩正俛虛俛實敵雖對面
莫測吾奇正所在矣故有殺生而無奇正至文也大概
密靜多内力焉徒誦空文為敵所誘是以章句易性命
耳或謂茲選止於唐之英華千卷何也夫唐詩不盡佳
而唐以後無詩唐文多直少曲而唐以後亦無文昔有
夢見龍者劉子作文嘲之豈非嘗見畫工者屈其脊掣
其爪施甲鬣雲氣於身者耶是夢畫也先輩有好鑄佛
者鑄罷輒毀三年不就工將去童子給之曰得無似人

面乎其人大悟一夕而佛容成故唐之文猶似夢畫也
猶似人面也然英華一書大奇有學士家廣之至萬卷
更奇予將續出宋文生氣太多能活而不能殺其根易
爛勢不得不為元之詞曲而文統絕王歐老泉子瞻文
非不佳亦如王唐瞿薛以時文雄特而已國初方宋解
劉諸公及王文成楊文襄輩直達胸臆不求其工大抵
過直過莊猶有唐人之遺是以文心鬱蒸戰勲亦不乏
其後才子成羣著書盈素有一篇不模擬否有一段不

帶恢諧嘲笑而其文得工否故文日萎蕭武日弛廢試
觀今日武功何如哉不咎文士之雜之弱而訾介胄是
舍種求植也請與海內誦喬潭賦劍舞劍舞者唐羽林
裴公獻戎捷於京師上御花萼樓大置酒酒酣詔將軍
舞劍為天下壯觀其辭曰奮紫髯之白刃發帝庭之光
色天子穆然詔伶人黜鄭衛選色者使覘乎軍容舞者
俾觀乎兵勢夫女子可陣而況文章之士哉

諸子序


陳仁錫

學莫要乎六經人才莫急于經濟文章莫貴乎雄渾博大
何以有諸子之刻蓋欲返之於六經也以六經收諸子
不若以諸子返六經強其所厭不若用其所喜夫諸子
多救時之人然六經治未病諸子治已病六經治百家
之病諸子治一時之病六經藥物悉備而不預裁一方
病夫自取焉諸子方太具藥太猛乃治已也奇治人也
拙治一國也奇治一世也拙奇以方拙亦以方後之習
諸子者幾無疾而呻吟類無方而操藥又近於入虎狼

之窟採鳥喙之毒奚取焉人皆曰子才也子識也子腸也其實不知子為何氏能去驕氣與多慾態色與淫心乎能曳尾塗中乎刻之野能使孔子束帛以贈乎能却聘幣終身不仕乎能既放流睜乎能居游必擇乎能招隱鬼谷乎不能何以知人能浩肆恢奇乎能不流邪說乎能竣潔老成懸之咸陽乎不能何以知言諸子中大醫王四欲反汝情性而無由入老子醫怯夫一大手也故尚補汰之清冷之淵莊子醫熱夫一大手也故尚瀉無

政事則俗管子醫俗夫一大手也故尚法離騷有力於
詩亡之後屈子醫懃夫一大手也故尚厚雖然有其心
無其術墨子也中醫也有其心有其術不操其本及身
而止管子也時醫也齊生死一壽妖迂而自得不關痛
癢不詳標本莊子也儒醫也以言竊國必有天刑呂不
韋毒藥也天之刑申不在耕戰而在告訐其刑韓不在
名法而在以說難於富貴也貪醫也然言與法不可泯
矣噫天生我材其要擇術管子多欲亦多君之欲而布

局寬可大不可久晏子少欲亦少君之欲而結體隘善
閉不善開甚哉乎經濟之難子華子不云乎為人所處
者不得安其所處吾猶病言之不廣夫所以處人與所
以自處道在六經脩辭立誠斯雄渾博大也已因次前
集故漢以下不具論



文章辨體彙選卷二百九十二

欽定四庫全書

集部

文章辨體彙選卷二百九十四

詳校官中書_臣竇汝翼

主事銜_臣徐以坤覆勘

總校官檢討_臣何思鈞

校對官中書_臣葉蘭

謄錄監生_臣張元任

欽定四庫全書

文章辨體彙選卷二百九十三

明 賀復徵 編

序上

籍類

高士傳序

晉皇甫謐

孔子稱舉逸民天下之民歸心焉洪崖先生創高道於
上皇之代許由善卷不降節於唐虞之朝三代秦漢逮
乎魏興受命其中賢之主未嘗不聘巖穴之隱追遯世

之高是以易著東帛之義禮有玄纁之制詩人發白駒之歌春秋顯子臧之節明堂月令以季春之月聘名士禮賢者然則高讓之士王政所先厲濁激貪之務也史班之載乃所闕畧梁鴻頌逸民蘇順科高士或錄屈節雜而不純又近取秦漢不及遠古夫思其人猶愛其樹況稱其德而贊其事哉謚採古今八代之士身不屈於王公名不耗於終始自堯至魏凡九十餘人雖執節若夷齊去就若兩龔皆不錄也

三國名臣頌序

袁宏

夫百姓不能自牧故立君以治之明君不能獨治則為臣以佐之然則三五迭隆歷代承基揖讓之與干戈文德之與武功莫不宗匠陶鈞而羣才緝熙元首經畧而股肱肆力雖遭罹不同迹有優劣至於體分冥固道契不墜風美所扇訓草千載其睽一也故二八升而唐朝盛伊呂用而湯武寧三賢進而小白興五臣顯而重耳霸中古陵遲斯道替矣居上者不以至公理物為下者

必以私路期榮御員者不以信誠率衆執方者必以權謀自顯於是君臣離而名教薄世多亂而時不治故遽甯以之卷舒柳下以之三黜接輿以之行歌魯連以之赴海衰世之中保持名節君臣相體若合符契則燕昭樂毅古之流矣夫未遇伯樂則千載無一驥時值龍顏則當年控三傑漢之得賢於斯為貴高祖雖不以道勝御物羣下得盡其忠蕭曹雖不以三代事主百姓不失其業靜亂庇人抑亦其次夫時方顛沛則顯不如隱萬

物思治則默不如語是以古之君子不患弘道難患遭
時難遭時匪難遇君難故有道無時孟子所以咨嗟有
時無君賈生所以垂泣夫萬歲一期有生之通塗千載
一遇賢智之嘉會遇之不能無欣喪之何能無慨古人
之言信有情哉余以暇日嘗覽國志考其君臣比其行
事雖道謝先代亦異世一時也文若懷獨見之照而有
救世之心論時則人方塗炭計能則莫出魏武故委面
霸朝豫謀世事舉才不以標鑒故人亡而後顯籌畫不

以要功故事至而後定雖亡身明順識亦高矣董卓之亂神器遷逼公達慨然志在致命由斯而談故以大存名節至如身為漢隸而迹入魏幕源流趣舍抑亦文若之謂所以存亡殊致始終不同將以文若既明且哲名教有寄乎夫仁義不可不明則時宗舉其致生理不可不全故識達攝其契相與弘道豈不遠哉崔生高明折而不撓所以策名魏武執笏霸朝者蓋以漢主當陽魏后北面者哉若乃一旦進璽君臣易位則崔生所以不

與魏氏所以不容夫江湖所以濟舟亦所以覆舟仁義
所以全身亦所以亡身然而先賢玉摧於前來哲攘袂
於後豈天懷發中而名教束物者乎孔明盤桓俟時而
動遐想管樂遠明風流治國以禮人無怨聲刑罰不濫
沒有餘泣雖古之遺愛何以加茲及其臨終顧託受遺
作相劉后授之無疑心武侯受之無懼色繼體納之無
貳情百姓信之無異辭君臣之際良可咏矣公瑾卓爾
逸志不羣總角斷主則素契於伯符晚節曜奇則三分

於赤壁惜其齡促志未可量子布佐策致延譽之美輟
哭止哀有翼戴之功神情所涉豈徒謬而已哉然杜
門不用登壇受譏夫一人之身所照未異而用舍之間
俄有不同況沉跡溝壑遇與不遇者乎夫詩頌之作有
自來矣或以吟咏情性或以紀德顯功雖大指同歸所
託或乖若夫出處有道名體不滯風軌德音為世作範
不可廢也復綴序所懷以為之贊云

通典序

唐李翰

儒家者流傳而寡要勞而少功何哉其患在於習之不
精知之不明入而不得其門行而不由其道何以徵之
夫五經羣史之書大不過本天地設君臣明十倫五教
之義陳政刑賞罰之柄述禮樂制度之統究理亂興亡
之由立邦之道盡於此矣非此典者謂之無益世教則
聖人不書學者不覽懼人冗煩而無所從也先師宣尼
祖述堯舜憲章文武七十子之徒常宣明大義三代之
道百代可師而諸子云云猥復制作由其門則其教已

備反其道則其人可誅而學者以多閱為廣見以異端為博聞是非紛然塞胸滿腹鴻洞茫昧而無條貫或舉其中不知其本原其始不要其終高談有餘待問則泥雖驅馳百家日誦萬字學彌廣而志彌惑聞愈多而識愈疑此所以勤苦而難成殆非君子進德修業之意也今通典之作昭昭乎其警覺羣迷歟以為君子致用在乎經邦經邦在乎立事立事在乎師古師古在乎隨時必參今古之宜窮終始之妙始可以度其終古可以行

於今問而辨之端如貫珠舉而行之審如中鵠夫然故
施於文學可為通儒施於政事可建皇極故採五經羣
史上自皇帝至於我唐天寶之末每事以類相從舉其
終始歷代沿革廢置及當時羣生論議得失靡不條載
附之於事如人支脈散綴其體凡有八門勒成二百卷
號曰通典非聖之書垂聖人微旨不取焉惡煩雜也事
非經世緯俗程制亦所不錄棄無益也若使學者得而
觀之不出戶知天下未從政達人情罕更事知時變為

功易而速為學精而要其道甚直而不徑其文甚詳而不煩推而通放而準語備而理盡例明而事中舉而措之如指諸掌不假從師聚學而區以別矣非聰明獨見之士孰能修之淮南元戎之佐曰尚書主客郎京兆杜公君卿雅有遠度志於興邦篤於好古生而知之以大歷之始實纂斯典累年而成杜公亦自為序引各冠篇首或前史有闕中高見發明以示勸誡用存景行近代學士多有撰集其最著者御覽藝文玉燭之類網羅古

今博則博矣然率多文章之事記問之學至於刊列百
度緝熙王猷至精至粹其道不雜比於通典非其倫也
於戲今之人賤近而遺遠昧微而觀著得之者甚鮮知
之者至稀可以歎息也翰與杜公數句探討故頗詳旨
趣而為之序

古今家誠序

宋蘇轍

老子曰慈故能勇儉故能廣或曰慈則安能勇曰父母
之於子也愛之深故其為之慮事也精以深愛而行精

慮故其為之避害也速而就利也果此慈之所以能勇也非父母之賢於人勢有所必至矣轍少而讀書見父母之戒其子者諄諄乎惟恐其不盡也惻惻乎惟恐其不入也曰嗚呼此父母之心也哉師之於弟子也為之規矩以授之賢者引之不賢者不強也君之於臣也為之號令以戒之能者予之不能者不取也臣之於君也可則諫否則去子之於父也以幾諫不敢顯皆有禮引焉父母則不然子雖不肖豈有棄子者哉是以盡其有

以告之無憾而後止詩曰洞酌彼行潦挹彼注茲可以
饒饒豈弟君子民之父母夫雖行潦之陋而無所棄猶
父母之無棄子也故父母之於子人倫之極也雖其不
賢及其為子言也必忠且盡而況其賢者乎太常少卿
長沙孫公景修少孤而教於母母賢能就其業既老而
念母之心不忘為賢母錄以致其意既又集古今家誠
得四十九人以示輟曰古有為是書者而其文不完吾
病焉是以為此合衆父母之心以遺天下之人庶幾有

益乎轍讀之而歎曰雖有悍子忿鬪於市莫之能止也
聞父之聲則斂手而退市人之過之者亦莫不泣也慈
孝之心人皆有之特患無以發之耳今是書也要將以
發之歟雖廣之天下可也自周公以來至於今父戒四
十五母戒四公又將益廣之未止也

列女傳目錄序

曾鞏

劉向所叙列女傳凡八篇事具漢書向列傳而隋書及
崇文總目皆稱向列女傳十五篇曹大家註以頌義考

之蓋大家所註離其七篇為十四與頌義凡十五篇而益以陳嬰母及東漢以來凡十六事非向書本然也蓋向舊書之亡久矣嘉祐中集賢校理蘇頌始以頌義為篇次復定其書為八篇與十五篇者並藏於館閣而隋以頌義為劉歆作與向列傳不合今驗頌義之文蓋向之自叙又藝文志有向列女傳頌圖明非歆作也自唐之亂古書之在者少矣而唐志錄列女傳凡十六家至大家註十五篇者亦無錄然其書今在則古書之或有

錄而亡或無錄而在者亦衆矣非可惜哉今校讐其八篇及十五篇者已定可繕寫初漢承秦之敝風俗已大壞矣而成帝後宮趙衛之屬尤自放向以謂王政必自內始故列古女善惡所以致興亡者以戒天子此向述作之大意也其言大任之娠文王也目不視惡色耳不聽淫聲口不出教言又以謂古之人胎教者皆如此夫能正其視聽言動者此大人之事而有道者之所畏也顧令天下之女子能之何其盛也以臣所聞蓋為之師

傳保姆之助詩書圖史之戒珩璜琚瑀之節威儀動作之度其教之者雖有此具然古之君子未嘗不以身化也故家人之義歸於反身二南之業本於文王夫豈自外至哉世皆知文王之所以興能得內助而不知其所以然者蓋本於文王之躬化故內則后妃有闕雎之行外則羣臣有二南之美與之相成其推而及遠則商辛之昏俗江漢之小國兔置之野人莫不好善而不自知此所謂身修故家國天下治者也後世自學問之士多

狗於外物而不安其守其室家既不見可法故競於邪
侈豈獨無相成之道哉士之苟於自恕顧利冒恥而不
知反已者徃徃以家自累故也故曰身不行道不行於
妻子信哉如此人者非素處顯也然去二南之風亦已
遠矣況於南鄉天下之主哉向之所述勸戒之意可謂
篤矣然向號博極羣書而此傳稱詩芣苢栢舟大車之
類與今序詩者之說尤乖異蓋不可考至於式微之一
篇又以謂二人之作豈其所取者博故不能無失與其

曰象計謀殺舜及舜所以自脫者頗合於孟子然此傳或有之而孟子所不道者蓋亦不足道也凡後世諸儒之言經傳者固多如此覽者采其有補而擇其是非可也故為之序論以發其端云

文獻通考序

元馬端臨

昔荀卿子曰欲觀聖王之跡則於其粲然者矣後王是也君子審後王之道而論於百王之前若端拜而議然則考制度審獻章博聞而強識之固通儒事也詩書春

秋之後惟太史公號稱良史作為紀傳書表紀傳以述
理亂興衰八書以述典章經制後之執筆操簡牘者卒
不能易其體然自班孟堅而後斷代為史無會通因仍
之道讀者病之至司馬溫公作通鑑取千三百餘年之
事迹十七史之紀述萃為一書然後學者開卷之餘古
今咸在然公之書詳於理亂興衰而畧於典章經制非
公之智有所不逮也編簡浩如烟埃著述自有體要其
勢不能以兩得也竊嘗以為理亂興衰不相因者也晉

之得國異乎漢隋之喪邦殊乎唐代各有史自足以該一代之終始無以參稽互察為也典章經制實相因者也殷因夏周因殷繼周者之損益百世可知聖人蓋已預言之矣爰自秦漢以至唐宋禮樂兵刑之制賦歛選舉之規以至官名之更張地理之沿革雖其終不能以盡同而其初亦不能以遽異如漢之朝儀官制本秦規也唐之府衛租庸本周制也其變通張弛之故非融會錯綜原始要終而推尋之固未易言也其不相因者猶

有溫公之成書而其本相因者顧無其書獨非後學之所宜究心乎唐杜岐公始作通典肇自上古以至唐之天寶凡歷代因革之故粲然可考其後宋白嘗續其書至周顯德近代魏了翁又嘗作國朝通典然宋之書成而已無傳魏嘗屬藁而未成書今行於世者獨杜公之書耳天寶以後蓋缺焉有如杜書綱領宏大考訂該洽固無以議為也然時有古今述有詳畧則夫節目之間未為明備而去取之際頗欠精審不無遺憾焉蓋古者

因田制賦賦乃米粟之屬非可析之於田制之外也古者任土作貢貢乃包篚之屬非可雜之於稅法之中也若乃叙選舉則秀孝與銓選不分叙典禮則經文與傳注相汨叙兵則盡遺賦調之規而姑及成敗之迹諸如此類寧免小疵至於天文五行藝文歷代史各有志而通典無述焉馬班二史各有諸侯王列侯表范曄東漢書以後無之然歷代封建王侯未嘗廢也王溥作唐及五代會要首立帝系一門以叙各帝歷年之久近傳授

之始末次及后妃皇子公主之名氏封爵後之編會要者倣之而唐以前則無其書凡是二者蓋歷代之統紀典章係焉而杜書亦復不及則亦未為集著作之大成也愚自蚤歲蓋嘗有志於綴緝顧百罹熏心三餘少暇吹竽已澁汲綆不修豈復敢以斯文自詭昔夫子言夏殷之禮而深慨文獻之不足徵釋之者曰文典籍也獻賢者也生乎千百載之後而欲尚論千百載之前非史傳之實錄具存可以稽考儒先之緒言未遠足資討論

雖聖人亦不能臆為之說也竊伏自念業紹箕裘家藏
墳索挿架之收儲趨庭之問答其於文獻蓋庶幾焉嘗
恐一旦散軼失墜無以屬來哲是以忘其固陋輒加考
評旁搜遠紹門分彙別曰田賦曰錢幣曰戶口曰職役
曰征榷曰市糴曰土貢曰國用曰選舉曰學校曰職官
曰郊社曰宗廟曰王禮曰樂曰兵曰刑曰輿地曰四夷
俱倣通典之成規自天寶以前則增益其事迹之所未
備離析其門類之所未詳自天寶以後至宋嘉定之末

則續而成之曰經籍曰帝系曰封建曰象緯曰物異則
通典原未有論述而採摭諸書以成之者也凡叙事則
本之經史而參之以歷代會要以及百家傳記之書信
而有證者從之乖異傳疑者不錄所謂文也凡論事則
先取當時臣僚之奏疏次及近代諸儒之評論以至名
流之燕談稗官之紀錄凡一話一言可以訂典故之得
失證史傳之是非者則採而錄之所謂獻也其載諸史
傳之紀錄而可疑稽諸儒先之論辨而未當者研精覃

思悠然有得則竊著已意附其後焉命其書曰文獻通考為門二十有四為卷三百四十有八其每門著述之成規考訂之新意則各以小序詳之昔江淹有言修史之難無出於志誠以志者憲章之所繫非老於典故者不能為也陳壽號善敘述李延壽亦稱究悉舊事然所著二史俱有紀傳而獨不克作志重其事也況上下數千年貫串二十五代而欲以末學陋識操觚竄定其間雖復窮老盡氣剝目鉅心亦何所發明聊輯見聞以備

遺亡耳後之君子儻能芟削繁蕪增廣闕畧矜其仰屋之勤而俾免於覆車之愧庶有志於經邦稽古者或可考焉

忠史序

歐陽玄

忠也者盡己之名也天以事物當然之理賦於人人盡其所當然者而無憾焉是之謂忠今語人曰臣事君以忠與忠恕之忠同則莫不駭然以為非而實然也或曰臣盡臣道於君忠矣子盡子道於父何獨曰孝乎曰不然

也禮所為內盡於己而外順於道忠臣以事其君孝子
以事其親其本一也此即吾說也然則上盡其所當然
於其下其名曰何曰盡有不敢不勉之義上下之間必
有別也故盡之對為推推即恕矣程子嘗謂忠恕一也
事上之道莫若忠使下之道莫若恕後儒疑之未喻此
也人生而靜動與物接即有盡已不盡已二者出乎其
間識者知其然固無一息而非吾效忠之時也是道也
所以事君所以事天詩曰昊天曰明及爾出王昊天曰

旦及爾游衍宜其嚴乎番陽楊玄翁有見於此久矣大父通守在軒先生當宋季官守以直聞難以死節著玄翁慨慕先志作忠史十餘年成書於是上下數千年臣子大義粲然畢具微而一言一行苟無愧於盡已者悉錄之又微而裔夷小邦婦人女子之操不遺也又極而心跡形似之間皆有以覈其實是非枉直瞭然不繆於古人何其至公而當也嗚呼自忠之為說不明士大夫平居無涵養省察之功蒞事無鞠躬盡瘁之志立朝無

直言敢諫之風至於臨難死節能保其必然也耶嗚呼
宇宙間此道明即天地變化草木蕃不明即天地閉賢
人隱甚可畏也余為國子博士時職當校獻書既表章
之猶思玄翁著書之志未白也故述忠說於斯嗚呼是
書果行於世也夫書之幸也夫世之幸也夫年月日具
官歐陽玄序

右編序

明唐順之

古今宇宙一大碁局也天時有從逆地理有險易人情

有愛惡機事有利害皆基局中所載也古聖人經天緯地畫野肇州設官分職正外位內幽明人鬼不相瀆擾奸良淑慝鳥獸戎夷各止其所所以界基局也至於奕數之變縱橫翻覆紛然不齊雖其紛然不齊而至於千百億局則其變亦幾乎盡而其法亦畧備矣自三代之末至於有元上下二千餘年所謂世事理亂善惡利害情偽凶吉成敗之變雖不可勝窮而亦幾乎盡經國之士研精畢智所以因勢而曲為之慮者雖不可為典要

而亦未嘗無典要也語云人情世事古猶今也豈不然哉奏議者奕之譜也師心者廢譜拘方者泥譜其失均也有見乎背立之說則以病背水之軍有見乎死地之說則以置背水之軍然而二說同出於十三篇中焉可泥也而焉可廢也余之纂右編特以為譜之不可廢而已而未及乎不泥譜之說也右編者古者右史紀言也

左編附序

唐順之

左編者為治法而纂也非關於治者勿錄也關於治者

則妃后外戚儲宗宦倖奸篡方鎮夷狄草莽之亂而總之將與相而總之君亦云備矣然周官治典所職曰師曰儒師儒何與於治典也君與相與將行之師儒講而明之故云師道立則善人多而朝廷正言師儒之係乎治者重也故纂前史儒林道學諸傳為諸儒傳經生訓詁文詞筆劄儒之別也故次之諸儒之後隱士不事王侯而志可則深處巖壑而龍光於朝英主亦徃徃尊禮其人以風世所謂以無用為用也故纂隱逸傳至於前

史有方技傳蓋巫史宗祝所以左右人君而星歷醫藥
百工皆有國者之不可缺以漢一時論之東方之詖諧
滑稽而要之引君於正丘子明之卜毛延壽之畫與巫
蠱之禍則其為奸不可窮詰其所係殆若此故纂方
技傳三代而下儒術與二氏相盛衰亦世道之變也馬
遷傳老子范史始紀西域沙門夫二氏之書各五千餘
卷其說侈矣則其人宜不可以無紀也且以觀儒術之
盛衰焉纂二氏傳而總之為左編附云

奇女子傳序

陳繼儒

陳子冬日居山中擁短褐偃曝於積薪之上執易學義一卷且讀且睡齟齬然適也已童子扣扉投一緘索叙奇女子傳余曰易稱無成有終詩稱無非無儀女子而以奇顯非閨壻事也雖然河洛不載奇偶乎易不載兒少女離中女巽長女乎詩不載卷耳樛木乎春秋左國不載共姜共伯之母乎其他中壘之列女有傳臨川之賢媛有世說何獨於奇女子而異之夫大丈夫生而逢年

或不得志以殉其磊砢光大之行或見于學士大夫之
史書及逸民遺老之筆記猶庶幾有一二存焉者獨婦
人女子生長深閨之中淪落於山陬海曲村墟草莽間無
限雖有奇無聞即聞亦不過如野燒之跡流螢之火若
隱若現若存若亡而已故長卿哀而集之小加評鑒其
間有奇節者奇識者奇慧者奇謀者奇膽者奇力者奇
文學者奇情者奇使者奇癖者種種諸類小可以撫掌
解頤大可以奪心駭目古來才子絕未嘗一盤拈出何

也男子如日女子如月日則亘萬圓常圓而月則有盈有缺有晦其得列於二史者盈之象也其偶見於雜家小說而未標其大全者缺之象也泯泯汶汶晦之象也若本無指撓而不幸為綺語人所點綴其蝕於太陽翳於雲霧風雨飛流伏匿於妖星惡曜者乎自長卿此書出譬如見月者或喜其新或美其滿或樂其萬里之清虛或快其重輪之華彩天壤間好月可廢則寄女子亦可廢也請無以六經解嘲矣

米襄陽志林序

陳繼儒

予讀陸友仁米顛遺事恨其故實未備嘗發意排纂江東好古收藏之家所遇襄陽書畫小有題識者輒手錄之而范長康多讀異書蒐討米事尤醜類而詳因題曰志林請予叙予惟古今雋人多矣惟米氏以顛著要之顛不虛得大要浩然之氣全耳後人喜通脫而憚撿括沓拖拉擲沾沾藉米顛氏為口實夫米公之顛談何容易公書初摹二王晚入顏平原擲斤置削而後變化出

馬其雲山一一以董巨為師詩文不多見顧崖絕魁壘
有深往者而公之顛始不俗兩蘓黃豫章秦淮海薛河
東德麟龍眠劉涇王晉卿之徒皆愛而樂與之遊相與
跌宕文史品題翰墨而公之顛始不孤所居有寶晉淨
名海岳自王謝顧陸真蹟以至摩詰玉躐金題幾埒祕
府而公之顛始不寒陪祀太廟洗去祭服藻火至褫職
好潔疾淫性不能忍而公之顛始不穢冠帶衣襦起居
語默畧以意行絕不用世法而公之顛始不落近代奉

勅寫黃庭寫御屏奮毫振袖酣呌淋漓天子為卷簾動
色徹賜酒果文具甚則跪請御前研以歸而公之顛始
不屈挫寄人尺牘寫至芾拜則必整襟拜而書之而公
之顛始不墮狡獪嗚呼米顛曠代一人而已求諸古今
張長史得其怪倪元鎮得其潔敷文學士與高尚書得
其筆滑稽談笑游戲殿廷東方朔李白得其豪故曰米
公之顛談何容易公沒於淮陽軍先一月盡焚其平生
書畫預置一棺焚香清坐其中及期舉拂合掌而逝吾

視其胸中直落落無一物者其聖門所謂古之狂歟洙
泗之時楚狂在接輿濂洛之時楚狂在芾其顛可及也
其浩然之氣不可及也

世說新語序

王思任

讀史記之後或難為漢書讀漢書之後且不可看他史
今古風流惟有晉代至讀其正史板質冗木如工作瀛
州學士圖面面肥暫雖畧具老少而神情意態十八人
不甚分別前宋劉義慶撰世說新語專羅晉事而映帶

漢魏間十數人門戶自開科條另定其中頗置不安徵博未的吾不能為之諱然而小摘短拈冷提忙點每奏一語幾欲起王謝桓劉諸人之骨一一呵活眼前而毫無追憾者又說中本一俗語經之即文本一淺語經之即蓄本一嫩語經之即辣蓋其牙室利靈筆顛老秀得晉人之意於言前而因得晉人之言於舌外此小史中之徐夫人也嗣後孝標劄註時或以經配左而博瞻有功須溪貢評亦或以郭解莊而雅韻獨妙義慶之事於

此乎畢矣自弇州伯仲補批以來欲極玄暢而續尾漸長效顰漸失新語遂不能自主海陽張遠文氏得善本於江陵陳元植家悉發辰翁之隱黜陟諸公揀披各語註但取其疏惑評則賞其傳神義慶幾絕而復壽者遠文之力也遠文又精刪何氏之補別具一帙使其堂廡具在而新語之事又於此乎畢矣嗟乎蘭茗翡翠雖不似碧海之鯢鯨然而明脂大肉食三日定當厭去若見珍錯小品則啖之唯恐其不繼也此書泥沙既盡清味

自悠日以之佐漢史奚可也

讀史快編序

顧天垞

自昔良史多而善讀史者罕非罕也善讀者因史自得而神妙於無窮若孔明別申生重耳之安危奚暇口說哉逮宋諸君子乃始喜論古人堅執名理飾以詞辨是非褒貶不異繩之束坊之限後遂凜焉遵之而不敢易設有虛心默默細擇全史以世觀人以微觀顯以生平觀一節回視所遵成說其果合否惜乎古人之深大都

沒於論者之淺矣予庚子歲典試北闈首錄趙子無聲
無聲故嗜史於累朝興兆亡徵兵機事要瑰言懿蹟有
契於中者亟錄之久而成帙名曰快編時一繙閱欣然
忘世而了不立論蓋以古人娛已不以已見寔古人千
載之上快在古人千載之下快在無聲惡知其合惡知
其不合豈不偉哉嗟夫無聲於讀史則快乃其遇則苦
矣平生嚴於擇友所莫逆僅四五人年來皆相次顯貴
即庚子同榜士往往躋清要登九列而無聲猶然孝廉

每試主司咸欲得以為重遇尚書卷極意揣度輒收其
似而真無聲莫識也家故食貧迺復一意獨往於世益
枘鑿或曰以子之才游諸侯擁篲築宮良未足侈何自
苦無聲曰吾惟不屑歌魚以至是而又奚獵較為自是
人亦不復干以私閉戶讀快編而已矣

三注鈔序

鍾惺

三注鈔者鈔裴松之三國志注劉孝標世說新語注酈
道元水經注也序曰孔子云述而不作注者述之一端

也雖曾子之於大學文王周孔之於易以至左氏公穀之於春秋皆注也凡注之為言依於其所注者也故離乎其所以注者而不能為書離乎其所以注者而猶能為書蓋注者之精神有能自立於所注者之中而又遊乎其外者也三注是也夫是以可鈔也古人以書之力為注而後人不能以注之力為書則以古人重於視其述而後人輕於視其作也故予鈔三注而重有感於述作之際也或曰水經經也三國志史也世說說也書宜首經次

史次說子於三子世焉何居曰已離乎其所注者而直為注矣直為注則其次視諸注者之人之世焉可也

俠女傳序

郭之麟

舉世儒也傳俠俠丈夫事也傳女不幾刺繆乎曰儒其心俠其骨女其德丈夫其行可也嘗取儒者之成仁取義不忘久要求之俠者又取俠者之取予然諾修行砥名求之儒者儒之論說不啻詳矣而俠者固未嘗頌讀也俠者徃徃合儒者徃徃離嗟乎是何說也聞之老氏

上古之世甘食美衣民至老死不相往來此真有道之
世也失道後德失德後仁義斃斃焉踉跄焉詩書發冢
大儒臚傳而世可慨也設財役貧朋黨宗強比周古布
衣之俠靡得而聞而世可慨也抗遜機雲沒而扶輿清
淑之氣不鍾男子而鍾婦人而世更可慨也孔明以巾
幘遺司馬仲達退丈夫為女子予圖傳女俠進女子為
丈夫嗟乎世盡丈夫予之願矣若曰舉俠而世已鮮儒
舉女而世已鮮丈夫則予豈敢則予豈敢

文章辨體彙選卷二百九十三

欽定四庫全書

文章辨體彙選卷二百九十四

明 賀復徵 編

序十四

駢類

離騷章句序

漢王逸

昔者孔子叡聖明哲天生不王俾定經術乃刪詩書正
禮樂制作春秋以為後王之法門人三千罔不昭達臨
終之日則大義乖而微言絕其後周室衰微戰國并爭

道德陵遲譎詐萌生於是楊墨鄒孟孫韓之徒各以所知著造傳記或以述古或以明世而屈原履忠被讒憂悲愁思獨依詩人之義而作離騷上以諷諫下以自慰遭時暗亂不見省納不勝憤懣遂復作九歌以下凡二十五篇楚人高其行義瑋其文采以相教傳至於孝武帝恢廓道訓使淮南王安作離騷經章句則大義粲然後世雄俊莫不瞻仰攄舒妙思繼述其詞逮至劉向典校經書分以為十六卷孝章即位深弘道藝而班固賈

達復以所見改易前疑各作離騷經章句其餘十五卷
闕而不說又以壯為狀義多乖異事不要撮今臣復以
所識所知稽之舊章合之經傳作十六卷章句雖未能
究其微妙然大指之趣略可見矣且人臣之義以忠正
為高以仗節為賢故有危言以存國殺身以成仁是以
伍子胥不恨於浮江比干不悔於剖心然後德立而行
成榮顯而名稱若夫懷道以迷國佯愚而不言顛而不
能扶危而不能安婉婉以順上逡巡以避患雖保黃耆

終壽百年蓋志士之所恥愚夫之所賤也今若屈原膺忠貞之質體清潔之性直若砥矢言若丹青進不隱其謀退不顧其命此誠絕世之行俊彥之英也而班固謂之露才揚已競於羣小之中怨恨懷王譏刺椒蘭苟欲求進強非其人不見容納忿恚自沈是虧其高明而損其清潔者也昔伯夷叔齊讓國守志不食周粟遂餓而死豈可復謂有求於世而恨怨哉且詩人怨主刺上曰嗚呼小子未知臧否匪面命之言提其耳風諫之語於

斯為切然仲尼論之以為大雅引此比彼屈原之詞優
游婉順寧以其君不智之故欲提攜其耳乎而論者以
謂露才揚己怨刺其上強非其人殆失厥中矣夫離騷
之文依托五經以立義焉帝高陽之苗裔則詩厥初生
民時惟姜嫄也紉秋蘭以為佩則將翱將翔佩玉瓊琚
也夕擘洲之宿莽則易潛龍勿用也駟玉虬而乘鸞則
易時乘六龍以御天也就重華而陳詞則尚書咎繇之
謀謨也登崑崙而陟流沙則禹貢之敷土也故智彌盛

者其言博才益劭者其識遠屈原之詞誠博遠矣自孔丘終沒以來名儒博達之士著述詞賦莫不擬則其儀表祖式其模範取其要妙竊其華藻所謂金相玉質百歲無匹名垂罔極永不刊滅者也

離騷新序

宋晁補之

先王之盛時四詩各得其所王道衰而變風變雅作猶曰達於事變而懷其舊俗舊俗之亡惟其事變也故詩人傷今而思古情見乎詞猶詩之風雅而既變矣孟子

曰王者之迹熄而詩亡然則變風變雅之時王迹未熄
詩雖變而未亡詩亡而後離騷之辭作非徒區區之楚
辭不足道而去王迹愈遠矣一人之作奚取于此也蓋
詩之所嗟歎極傷於人倫之廢哀刑政之苛而人倫之
廢刑政之苛孰甚於屈原時耶國無人原以忠放欲返
幸君之一悟俗之一改也一篇之中三致意焉與夫三
宿而後出書於心猶以為速者何異哉世衰天下皆不
知止乎禮義故君視臣如犬馬則臣視君如國人而原

一人焉被讒且死而不忍去其辭止乎禮義可知則是詩雖亡至原而不亡矣使後之為人臣不得於君而熱中者猶不懈乎愛君如此是原有力於詩亡之後也此離騷所以取於君子也離騷遭憂也終窶且貧莫知我艱北門之志也何辜於天我罪伊何小弁之情也以附益六經之教於詩最近故太史公曰國風好色而不淫小雅怨誹而不亂若離騷者可謂兼之矣其義然也又班固敘遷之言曰大雅言王公大人德逮黎庶小雅譏

小民之得失其流及上所言各殊其合德一也司馬相如雖多虛詞濫說然要其歸引之於節儉此亦詩之風諫何異揚雄以謂猶騁鄭衛之音曲終而秦雅不已戲乎固善推本知之賦與詩同出與遷意類也然則相如始為漢賦與雄皆祖原之步驟而雄獨以其靡麗悔之至其不失雅亦不能廢也自風雅變而為離騷離騷變而為賦譬註有沱乾肉為脯謂義不出於此時異然也傳曰賦者古詩之流也故懷沙言賦橘頌言頌九歌言

歌天問言問皆詩也離騷備之矣蓋詩之流至楚而為
離騷至漢而為賦其後賦復變而為詩又變而為雜言
長謠問對銘贊操引荀類出於楚人之辭而小變者雖
百世可知故叅取之曰楚辭十六卷舊錄也曰續楚辭
二十卷曰變離騷二十卷新錄也使夫緣其辭者存其
義乘其流者反其源謂原有力於詩亡之後豈虛也哉
若漢唐以來所作非楚人之緒則不錄

變離騷序

晁補之

補之既集續楚辭二十卷又集變離騷二十卷或曰果異乎抑屈原之作曰離騷餘皆曰楚辭矣今楚人又變而迺始曰變離騷何哉又揚雄為反離騷反與變果異乎曰反離騷非反也合也蓋原死知原惟雄雄怪原文過相如至不容而死悲其文未嘗不流涕也以謂君子得時則大行不得則龍蛇遇不遇命也何必湛身哉乃作書往往撫其文而反之雖然非反其純潔不改此度也反其不足以死而死也則是離騷之義待反離騷而

益明何者原惟不為箕子而從比干故君子悼之不然
與日月爭光矣雄又旁離騷作廣騷旁惜誦而下作畔
牢愁雄誠與原異既反之何為復旁之又變離騷以其
類而異故不可以言反而謂之變若荀卿非蹈原者以
其後原皆楚臣遭讒為賦以風故取其七篇列之卷首
類離騷而少變也又嘗試自原而上捨三百篇求諸書
禮春秋他經如五子之歌豳首之斑然蠶則績而蟹有
筐佩玉藥兮吾無所系之祈招之悵悵鳳兮鳳兮他如

此者甚多咸古詩風刺所起戰國時皆散矣至原而復興則列國之風雅始盡合而為離騷是以由漢而下賦皆祖屈原然宋玉親原弟子高唐既靡不足於風大言小言義無所宿至登徒子靡甚矣特以其楚人作故繫荀卿七篇之後瓠子之歌有憂民意故在相如揚雄上而子虛上林甘泉羽獵之作賦之閎衍于是乎極然皆不若其大人反離騷之高妙猶終歸之於正義過高唐但論其世故繫高唐後至于京都山海宮殿鳥獸笙簫

衆器指事名物之作不專於古詩惻隱規誨故不錄李
夫人賦長門賦皆非義理之正然辭渾麗不可弃曹植
賦最多要無一篇逮漢者賦卑弱自植始錄其洛神賦
九愁九詠等并錄王粲登樓賦以見魏之文如此陸機
陸雲有盛名顧不足於植粲摘其義差近者存之思遊
有意乎幽通而下恨其流益遠矣然晉人喜清談而摯
虞此作庶幾有為而言致足嘉者也鮑昭長於文辭故
其蕪城作獨出宋世又以劉渙事諷劉瑱有心哉於此

者江淹用寡而文麗又梁文益卑弱然猶蒙虎之皮尚
區區楚人步趨也唐李白詩文最號不襲前人而鳴皋
一篇首尾楚辭也末云雞聚羣以爭食鳳孤飛而無鄰
嫫母衣錦西施負薪辭不彫而指類唐人知楚辭者少
誤以為詩云王維生韓柳前纔數十言雖淺鮮未足與
言義然低昂宛轉頗有楚人之態矣元結振奇自成一
家要曰羣言之異味亦可貴也顧况文不多約而可觀
問大鈞理勝招北客詞勝阿房宮云亦使後人而復哀

後人皆唐賦之不可廢者也皮日休九諷專效離騷其反招魂靳靳如影守形然非也竟離去畫者謹毛而失貌嗚呼離騷自此散矣故不錄以迄本朝名世之作多已載續楚辭中今所錄賦及文操或宏傑自出新意乍合乍離亦足以知古文之屢變至末而復起云或大意述此或一言似之要不必同同出於變故皆以附變離騷若謂之變楚辭乎則楚辭已非離騷楚辭又變則無離騷矣後無以後知此始於屈平矣惡夫愈遠而迷其

源若服盡然為之系其姓於祖故正名以存之

新校楚辭序

黃伯思

漢書朱買臣傳云嚴助薦買臣召見說春秋言楚辭帝甚說之王褒傳云宣帝修武帝故事徵能為楚辭者九江被公等楚辭雖肇於楚而其目蓋始於漢世然屈原之文與後世依放者通有此目而陳說之以為唯屈原所著則謂之離騷後人效而繼之則曰楚辭非也自漢以還文師詞宗慕其軌躅摘華競秀而識其體要者亦

寡蓋屈宋諸騷皆書楚語作楚聲紀楚地名楚物故可謂之楚辭若此只羌許蹇紛佗僚者楚語也頓挫悲壯或韻或否者楚聲也沅湘江澧修門夏首者楚地也蘭茝荃約蕙若蘋蘅者楚物也率若此故以楚名之自漢以還去古未遠猶有先賢風概而近世文士但賦其體韻其語言雜燕粵事兼夷夏而亦謂之楚辭失其指矣此書既古簡冊迭傳亥豕帝虎舛忤甚多近世秘書晁監美叔獨好此書乃以春明宋氏趙郡蘇氏本叅校失

得其子伯以叔予又以廣平宋氏及唐本與太史公記
諸書是正而伯思亦以先唐舊本及西都留監博士楊
建勲及洛下諸人所藏及武林吳郡槧本讐校始得完
善文有殊同者皆兩出之案此書舊十六篇并王逸九
思為十七而伯思所見舊本乃有揚雄反騷一篇在九
歎之後與九思共十有八篇而王逸諸序並載於書末
猶古文尚書漢本法言及史記自序漢書敘傳之體駢
列於卷尾不冠於篇首也今放此錄之又太史公屈原

列傳班固離騷傳序論次靈均之事為詳故編於王序
右而陳說之本以劉勰辨騷騷在王序之前論世不倫
故緒而正之而天問之章辭嚴義密最為難誦柳州
於千祀後獨能作天對以應之深宏傑異析理精博而
近世文家亦難遽曉故分章辨事以其所對別附於問
庶幾覽者瑩然知子厚之文不苟為艱深也自屈原傳
而下至陳說之序又附以今序別為一卷附十通之末
而目以翼騷云至於屈原行之忠狷文之正變事之當

否固昔賢之所詳僕可得而略之也

楚詞集註序

朱熹

右楚辭集註八卷今所較定其第錄如上蓋自屈原賦
離騷而南國宗之名章繼作通號楚辭大抵皆祖原意
而離騷深遠矣竊嘗論之原之為人其志行雖或遠於
中庸而不可以為法然皆出於忠君愛國之誠心原之
為書其辭旨雖或流於跌宕怪神怨懟激發而不可以
為訓然皆生於繾綣惻怛不能自己之至意雖其不知

學於北方以求周公仲尼之道而獨馳騁於變風變雅之末流以故醇儒莊士或羞稱之然使世之放臣屏子怨妻去婦枝淚謳吟於下而所天者幸而聽之則於彼此之間天性民彝之善豈不足以交有所發而增夫三綱五典之重此予之所以每有味於其言而不敢直以詞人之賦視之也然自原著此詞至漢未久而說者已失其趣如太史公蓋未能免而劉安班固賈逵之書世復不傳及隋唐間為訓解者尚五六家又有僧道騫者

能為楚聲之讀今亦漫不復存無以驗其說之得失而獨東京王逸章句與近世洪興祖補注並行於世其於訓詁名物之間則已詳矣顧王書之所取舍與其題號離合之間多可議者而洪皆不能有所是正至其大義則又皆未嘗沈潛反復嗟歎詠歌以尋其文詞指意之所出而遽欲取喻立說旁引曲證以強附於其事之已然是或以迂滯而遠於性情或以迫切而害於義理使原之所為抑鬱而不得伸於當年者又晦昧而不見白

於後世子於是益有感焉疾病呻吟之暇聊據舊編粗加櫟括定為集註八卷庶幾讀者得以見古人於千載之上而死者可作又足以知千載之下有知我者而不恨於來者之不聞也嗚呼希矣是豈易與俗人言哉

楚辭序

明何喬新

楚辭八卷紫陽朱夫子之所校定後語六卷則朱子以晁氏所集錄而刊定補著者也蓋三百篇之後惟屈子之辭最為近古屈子為人其志潔其行廉其誇辭逸調

若乘鷺駕虬而浮游乎埃壘之表自宋玉景差以至漢
唐宋作者繼起皆宗其槩矍而莫能尚之真風雅之流
而辭賦之祖也漢王逸嘗為之章句宋洪興祖又為之
補註而晁無咎又取古今辭賦之近騷者以續之然王
洪之註隨文生義未有能明作者之心而晁氏之書辨
說紛拏亦無所發於義理朱子以豪傑之才聖賢之學
當宋中葉阨於權奸迄不得施不啻屈子之在楚也而
當時士大夫希世媒進者從而沮之排之目為偽學視

子蘭上官之徒殆有甚焉然朱子方且與二三門弟子
講道武夷容與乎雲溪山月之間所以自處者蓋非屈
子所能及間嘗讀屈子之辭至於所謂往者余弗及來
者吾不聞而深悲之乃取王氏晁氏之書刪定以為此
書又為之註釋辨其比興之體而發其悲憂感悼之情
繇是作者之心事昭然於天下後世矣予少時得此書
而讀之愛其詞調鏗鏘氣格高古徐察其憂愁鬱悵繼
繼惻怛之意則又悵然興悲三復其辭不能自已使予

序之使讀者知朱子所以訓釋此書之意而不敢以詞
人之賦視之也嗟夫大儒著述之旨豈末學所能窺哉
然嘗聞之孔子之刪詩朱子之定騷其意一也詩之為
言可以感發善心懲創逸志其有裨於風化也大矣騷
之為辭皆出於忠愛之誠心而所謂善不由外來名不
可以虛作者又非聖賢之格言乎使放臣屏子呻吟咏
嘆於寂寞之濱則所以自處者必有其道矣而所歌者
幸而聽之寧不淒然興感而迪其倫紀之常哉此聖賢

刪定之大意也讀此書者因其辭以求其義得其義而反諸身焉庶幾乎朱子之意而不流於雕蟲篆刻之末矣


騷選序

汪道昆

風雅變而為騷江潭尚矣其徒二三速肖其下波流騷變而為選郊蘇李而禘張衡柏梁梁父祧矣漢其室事也魏其堂事也晉猶在阼餘悉在祊故波流無騷非無騷也善哭者無情而不哀騷之優孟也繹祊無選非無

選也雕幾工而太樸喪選之梧棬也以騷則逸為政以
選則統為政又惡乎取之或類有同方或體有各至藉
令必要其極寧詎能舉一而廢百邪許由有言有族有
祖聚族則由後率祖則由前比而合之選其族也騷其
祖也由前則推而進為六義為四詩由後則放而文為
貞觀為開元為大厯二氏迄今誦之勿絕其斯一當衡
石也與哉始予合騷選版之襄陽直將杓之百家之前
而行之三百篇之後厯二十年所版留郡中乃今學士

置若遺若天池浸淫乎洄酌以為爽予更授之剗剗門
人鄭生職之工告成生乃問序郡版故未有序道古者
殆難為言其能為逸也者統也者不越乎一家之言其
不為逸也者統也者庶幾乎先得我心矣



文章辨體彙選卷二百九十四